

老野狐二頭并小野狐五頭皆頭破血流滿地已斃自後寂無妖異亦絕祭祀廟宇荒廢是知凡持此咒勿得食蒜至甚觸穢天蓬將軍是北帝上將制伏一切鬼神豈止誅滅狐狸小小妖怪矣

王清遠神呪經驗

王清遠世居北邙山下唐咸通年時多疫疾清遠身雖在俗常護氣行藥誦神呪經自稱是嶽山真人遠孫是時天子蒙塵入蜀兵火不息疫癘大行連州而縣飢荒病患衆矣清遠佩授神呪經籙每行符藥救人多不受錢。只要少香油供養經籙鄉人迎請醫療日夕喧聞清遠有弟一人為僧名法超亦持大輪行秘字始清遠之醫道大亨忽一日冒夜來投止宿階以瓶盛狗血傾於清遠道堂內至二更已來忽聞空中有兵甲之聲頃間法超於牀上如有人拖拽叫喊唯言乞命清遠命燈照之但見以頭自頓地頭面血流至平明不息須臾之間但見兩脚直下如人拖拽奔竄入緜水江內浮屍水上閩市自擊無不

驚歎是知神呪真經實有神將吏兵守護豈容嫉靈庸僧將穢惡之物犯冒所謂為不善於幽暗之中神得而誅之清遠護氣持經除功濟物壽一百七歲辭世之夕闔境皆聞異香仙樂斯亦證道之階階矣

道教靈驗記卷之十

正一天師清微弟子 洪百堅 製作
道教學術資訊網站

道教靈驗記卷之十一

廣成先生杜光庭集

經法符錄靈驗

何道璋遇上清經驗

何道璋閬州奉國縣天目山道士也戒潔勤五十餘年矣衣食之外所得金帛必崇善古跡締飾宮觀一邑之中連創四觀復修雲臺東峯所至之處克有成績天目山昔有觀宇為野火所焚唯古碑荒殿而已道璋經之營之數年而廊廡周備當門立層樓周環作房室栽植花木間以松檜功用煥然其東北隅巨巖之上時有光景之異因裁松伐去枯枿二裂摧落愈實宛然於壺內得上清洞真寶經七十餘卷紙墨如新異香芬郁將置於殿內一夜有光閃響如神人所衛道璋不敢披讀收藏於函櫃之中旋以繕修未暇別為覽閱忽有客道流請經看之意欲竊去道璋亦疑為未盡檢與忽晴霽之夜星月皎然雷霆大震人皆惶遽旋風入觀中須臾開朗但覺香氣異常及檢點真經併已飛去道璋憂

惜久之夢神人謂曰太上以汝修奉專切投以神經皆上清大同修真之要而塵日竊窺不能嚴術經已收還天所復何所道哉

仙都觀石函經驗

忠州平都山仙都觀陰真人鎮山太平經武德中刺史獨孤辰取經欲進舟行半日有二龍一青一白橫江鼓波船不得進舟人驚懼復泝流還郡辰即命所由墊江路陸行進經時山川之中久無墊歎至是蛇虎當道經使恐懼將經却迴辰即修黃錄道場拜表上告然後取經以進在內道場供養綿歷歲年開元中供奉道士司馬秀准詔答醮名山開函取經但空函而已訶詰道衆疑是觀司隱滅法侶驚懼無詞披雪遂焚香上告具述武德中經已將去今詔旨搜訪無經上進仰憂謹責時景氣晴明野絕塵埃忽陰雲覆殿迅雷震擊俄而蒼宇澄霽經在案上異香盈空祥煙紛霧復得昔日所取之經以進會昌中賜紫道士郭重光曼玄奔復齋詔醮山取經石函之中經復如舊至今鎮觀者猶是此經不

知何年歸還耳

襄州城角鐵篆真文驗

襄州城後漢水昔人版築之時於城角鑄鐵仙人像手執方札上刻靈寶真文札方尺餘文字篆刻殊為精妙常時此角每有神異往來之人不敢汚犯俗中皆言此有巨蛇之穴或云嘗有城隍神現於其處及奇章公在鎮之年江波泛溢壞隄犯城此角摧剝方見鐵像及所刻符文下有隸書云元始五老敕直符尹豐奉靈寶真文以禳水害如赤書符命既而修復城池泥之如舊但不言刻符年月爾向若無此真文鎮於城壁巨波泛溢雉堞頽壞襄陽之陷未可知矣

陸含真水界石符文驗

道士陸含真自天台山將適剡縣暑而暴至山溪斗溢水深丈餘泥波沙浪諠擾尤甚兩面環隔危在其中坐憂淪墊無所攀涉忽有一石橫在其前截流斜渡出水二三寸長可文餘含真尋石之上越水而過既及前岸石復沉矣以杖攪水中無復蹤跡驚異良久莫

知其由又以杖攪水覺有一石稍小於前以杖攪之隨即涌出輕如朽木高取於岸上見其平穩清膩洗拭看之有大符一通刻於石上照畫周備全無隸字止是一符於側邊有字云真君二年制水符含真取紙筆稍寫其石移置於岸傍大楓樹下默記其符所在訪求莫可辨驗於諸壁縣白鶴觀看靈寶部經乃是洞玄五稱文北方辰星符也與經勘驗一無差異數年復過天姥關嶺上溪水之側訪其石符不復見矣

玄武樓北真文驗

光啓初大駕還京宮城修飾所司於玄武樓北夜見白光廣可半幅高餘丈許月色未照其明昭然疑其下有所藏寶貨掘深八九尺得青石函方四尺餘之中有蛇環繞忽失所在乃於函中得靈寶黑帝北方真文刻石板一片廣二尺二寸厚五寸題則隸書文皆篆字云黑帝玄老君鎮宮城符命復醮而藏之是夕工役之徒有見黑衣兵士百餘人森列其地如是三夕不復見矣按靈寶舊法王

城宮閣殿宇郡邑凡所制創先鎮五方真文以制召正神鎮護其所則隋唐宋城之時安平公依按玄經鎮符於此矣亦將是高宗大帝藏鎮此文以保衛宮內殿祥光滿空靈官警衛甚徒然也

劉運都功錄驗

都功錄昔天師昇天於雲臺山告示天地萬神曰吾昇天之後留太上所賜寶劍都功印錄以付子孫救護億兆此錄初以版署三品各有符文靈官佩受之者拜刺入靖以付之。至十三世天師以版錄所傳制作勞費所傳既廣所制不充改為紙錄或絹素寫之書篆績畫得以精備自是紙素之用行焉受者靈應自有都功錄驗三卷七十餘條咸通九年有劉運者大賢於西江力當鉅萬計因詣十九世天師傳受都功賜信靈膳致齋嚴潔念於衆人時入陽縣令劉劇天台道士劉儵然既是宗盟仍同傳度劇則久崇玄奧深造精微儵然秉志端貞將弘大教乃相約曰懋功惟勤所勤惟久即吾同學之志也無肆過以

貽咎稔惡以延災報師崇先以期福祉即吾同學之願也如是齋單數日散去是歲儵然與劇復於葛洪製神劍各一口依藏景石精之法以成明年三月劉運臥疾於金陵潤日綿篤卒于旅舍心上微暖留之兩夕而蘇速能運動良久起坐妻妾兒女環於其前且悲且喜曰吾大限盡矣食祿竭矣昨為冥官所追以小舟載過江北得馬乘之但見鞍鞵不親馬之首尾其行甚速送入大城中城上皆虎豹守陣龍蛇環壘旗幟仗自地列之出城之表長可百尺入門為吏士驅擁到西北

隅見囚繫考掠播楚者不知其數忽有黃光自天而下初則城內昏暝黃光所照豁然開明黃衣使者乘空而至官吏列行拜迎執素簡丹書讀曰劉運身佩正錄名係上天非地司所攝大限既足可延三十年在身祿食依今豐泰親見天光者皆息其罪考原其刑責由是載生遂拔楊修道精卓香火入龍虎山師奉天師矣

玉霄葉尊師符驗

天台山玉霄宮葉尊師修養之暇亦以符術救人婺州居人葉氏其富億計忽中癩狂之疾積年不瘳數月尤頓後乃叫號悲笑裸露奔走力敵數人初以絹索繫之俄而絕絆出通衢犯公署不可支吾官以富室之子不能加罪頗有所犯亦約束其家嚴為守衛加持禳制飯僧祈福祠神鬼召巫覡靡所不作莫能效效其家素不信道偶有人謂之今詣天台請玉霄尊師符可祛此疾不然真知其可也乃備繒帛器皿入山請符尊師謂使者

曰此符到家疾當愈矣無以器帛為用盡歸之使者未至三日疾者方作斷絙投石舉家閉戶以拒之折關投鈴力不可禦如此狂猛非人所遏忽速歛容自歸其室盥洗巾櫛束帶鞞足執版盤折於門內道左其色怡然一家折喜爭問其故笑而不答但言天使即來飲食都忘夕不眠寢孜孜為企踵翹足延頸望風汗流浹背不敢為倦如此二日三夕使者持符而至入門迎拜懼呼踊躍前道符服之暝然食頃疾已瘳矣由是躬詣山門厚

施金帛助修宮宇一家修道置靖室道堂旦夕焚修焉初玉霄賜三符一已吞之一帖房門之上葉之女使竊酒飲之嘔於符下葉見一神人介金執劍長可三四寸從符中出去焚香拜謝而不見其歸數日親戚家女使近

患風魔疾尚未甚因來葉房之前立且未定忽叫一聲禁見符中將軍如前之形揮劍於女使頭上問其故云適有神人以劍於頭上斬下一物墜衣領中今二三女僕扶持驗有蛇頭如指斷在衣領中血猶滴焉風魔之疾自此亦愈

賈瓊受正一籙驗

成都賈瓊年三歲其母因看蠶市三月三日過龍興觀門眾齋受籙遂詣觀受童子籙一階十餘年後因女兄有疾母為請處士吳太玄為人冥看檢致疾之由仍看弟兄年命凶吉經宿太玄還言疾由江瀆求之即差籍中不見有賈瓊之名父母愈憂復請太玄看之時太玄每與人入冥檢事必鎖於一室中安寢而往不使人驚呼候其自醒喚人開門乃

開之歷歷說冥中之事有如目擊言必信驗或一宿或兩宿然後迴耳既載往檢瓊名字云年三歲時三月三日於龍興觀受正一籙已名係天府不屬地司地籍之中不見名字於天曹黃簿之內檢得其名

李玄禮護命經驗

長安李玄禮居修德坊因左街與唐觀雲御大師李雲謫講下受護命經精心諷念不啻萬遍每有善惡之事髮鬚預知黃巢入關隨眾奔竄因被俘虜三五十人驅至昌化賊師見之下階迎拜曰此人誰教願來揖之與坐玄禮驚怖未即上階延請載三乃與之坐問所修何善果報如此答云曾於講下受道家消災護命經持之萬遍矣師言甚見君子來時前有童子四人大仙二人與君子並進後有金甲神王金剛力士獅子神獸塞滿庭中疑是帝王聖人有此侍衛既是道經願傳一本玄禮曰此經三百餘字一紙可書傳之甚易為焚香念一遍即寫授之師命士卒十餘人衛送出城得達行在

尹言陰符經驗

尹言者修德坊居與明道大師尹嗣玄為宗姓之弟常崇道慕善孜孜不倦因詣嗣玄受陰符經至誠諷念為其常少記性願得心神聰爽受之數年念逾萬遍頭覺心力開悟因本命日齋潔焚香念三十餘遍忽了憶前生之事姓張名處厚在延壽坊居家有巨業兒女皆存記其小字年幾一一明了與其家說之乃往尋訪述張生死年月形色情性無所差異張之兒女聞之嗚咽感認言其今之狀貌與昔不殊但性較舒緩耳自是兩家契為骨肉黃冠犯關之前其二家皆在

高相三皇內文驗

丞相高燕公駢初鎮成都也樂營之內有狸魁焉投瓦擲石變化術怪無所不為公甚怒之符禁穰穰皆不能已大德何彝範日嘗見抱朴子云其所居鄰里忽有虎暴害牛稚川按法書地皇內文行之有神人大冠緇衣佩劍執版冠中有小鳥如生夜至庭中問稚川曰所召何也以虎暴告之明旦一二里間有

二虎斃於林下請訪三皇內文試為行之公
素有洞神經彙範書數字按法用新盆關於
灰上置符及香於盆底之上依而用馬是夕
有老狸毛已充落死於盆下其醜遂絕

張乾曜天蓬呪驗

成都至真觀道士張乾曜精奉香火虔誠齋
法首冠於衆人節度使燧煌李公有男無疾
暴卒舉體猶暖倉惶之際不知所為召醫巫
禁術者數十人皆不知救理之法良久請乾
曜到告以食卒之事乾曜素無他術止於精
奉經科而已情理既切因請鈔水為救水噴
灑了焚香念天蓬呪一百餘遍卒者忽能運
動良久乃蘇問其所見云有黃衣使四人擁
一駿馬令其試騎上馬之後使被將去前路
昏曠如在煙霧之中遙巡見張尊師緋絹抹
額手執利劍領黑衣兵士數千人結陣而來
其行更速使人馬尋已不見其墜在地下因
悶多時尊師童子扶昇方得歸耳李公令此
郎君依乾曜入道冠褐數年到京除官方還
儒服施錢三百千絹五百匹以答乾曜焉

趙業授正一八階錄驗

趙業定州人開成中為晉安縣令因疾暴卒
手足柔輾心上微暖三日乃蘇云初為冥官
所追牽拽甚急問其所以但云為欠債抵諱
事自思身心無此罪犯必恐誤追行三五十

里過一山嶺嶺上有宮闕崇麗人物甚多有
一青衣童子前來問云汝非道士趙太玄乎
某答云晉安縣令趙業耳童子笑曰豈得便
忘却耶又一童子續來太一令喚趙太玄追
事人一時散去即與童子到宮闕中不見太
一但見一道流云汝六歲時為有疾受正一
八階法錄名為太玄豈得沉於俗官併忘此
事耶太一有命便令放還却須佩錄修真行
功及物居官理務勿貪積貨財輕人性命言
訖不見所疾已蘇遂於思衣山恭受法錄累
置壇場廣崇功德復以法名太玄矣

道教靈驗記卷之十一

道教靈驗記卷之十二

廣成先生杜光庭集

經法符錄靈驗

僧法成改經驗

僧法成姓陳不知何許人立性拘執束於奉
教而矯飾多端因遊廬山至簡寂觀不遇道
流而堂殿經廚素不關鑰遂取道經看之將
三四十卷往靈溪觀棲止詎云某在僧中本
意好道欲於此駐泊轉讀道經兼欲長髮入
道人皆善其所言又取觀中經百餘卷日多
披覽每三五日一度下山教化糧食人聞其
所說施與甚多糧鹽所須計月不闕乃故換
道經題目立佛經名字改天尊為佛言真人
為菩薩羅漢對答詞理亦多換易塗抹剪破
計一百六十餘卷忽山下有人請齋兼欲求
勾紙筆借觀奴一人同去行三二里見軍吏
隊仗訶道甚嚴謂是刺史遊山法成與奴下
道於林中迴避良久見旗幟駐限有大官立
馬於道中促喚地界令捉僧法成來法成與
奴聞之未暇奔竄力士數人就林中擒去奴